

Minister Otmar Oduber ta splica kico kiermen socializa e tarifa di Serlimar y su meta

ORANJESTAD (AAN) – Dentro di e tema di tarifanan social di Serlimar y solucion pa Parkietenbos, Minister Otmar Oduber a subraya cu Dialuna aki, casualmente, na un manera simbolico, tur e sushi domestico cu antes tabata bay Parkietenbos e no ta bay mas.

Ningun truck di sushi ta tira desperdicio den e dump, cumpliendo cu un di e compromisonan cu gobierno a haci cu nos comunidad.

Na di dos lugar, aworaki tin un proceso ta tumando lugar unda cu na Augustus- September lo bin un destaho publico pa e decision y direccion cu gobierno a tuma, di instala un incinerator cu lo mester percursa pa e tecnologia di waste energy pa atende cu e sushi y lo nifica e remedi final di cera Parkietenbos completa y definitivamente aki un aña y mey.

Den e cuadro aki e combersacionnan a desaroya cu e tres sindicatonan ya menciona, pa mustra cu lo kier socializa e tarifanan.

E mandatario a reitera cu socializa e tarifa kiermen percursa pa e grupo cu tin schouder menos hanchu den comunidad por haya sosten di e grupo cu tin un lomba mas hanchu. Asina aki a yega dia 21 di Juni na un tarifa cu a wordo palabra unda practicamente un 55% di e hogarnan lo tin un tarifa mas social di loke tabata tin anteriormente y un grupo di mil y un cien cas, cu ta e grupo cu ta cay den e categoria di un entrada di riba 20 mil florin pa luna, lo mester paga 90 florin pa luna. Den e grupo cu un entrada di entre



10 mil pa 20 mil florin, cu mester paga 65 florin pa luna, e minister hunto cu su señora mes ta cay, segun el a expresa pa pone su mes como ehemplo te yega na e grupo di 18 mil cas cu sea ta famia di mama of tata soltero cu ta haya salario minimo, cu no ta paga nada, mescos esnan cu ta cobra pension di AOV so, soltero of pareha casa, tampoco ta paga, y esnan cu ta biba di bijstand of handicap uitkering. Nan ta e grupo mas vulnerable cu ta cay den e entrada di 24 mil florin pa aña, kiermen menos di 2 mil florin pa luna.

E mandatario a indica cu e meta di e tarifa social aki ta pa cumpli cu e ley cu tin na e momentonan aki.

Minister Oduber a reitera cu gobierno no a cambia ningun ley, gobierno ta ehecutando un ley cu a keda introduci na aña 2005-2007 caba pero ta haciendo e tarifa mas social pa sigui cubri e deber cu Serlimar a haya mediante e ley.

E ley no ta duna Serlimar djis e poder di recoge sushi na Aruba, pero pa mantene henter Aruba limpi, ruim op e dumpnan ilegal. Por mira aworaki cu Task Force hunto cu Serlimar, DOW y City Inspector ta haciendo limpi henter Aruba. E ley ta bisa cu Serlimar tin cu piki tur auto bieu rond di caminda, benta den bario, y cu ta trece peligro pa higiene den bari-onan. Ley ta bisa Serlimar cu e mester recoge tur bestia morto riba caminda, den caya, den bario sin cobra pa e actividad aki, pasobra e ta cobrando caba den e totalidad. Tambe piki takinan di kwihi cu ta cay rasca auto, tambe Serlimar tin cu hacie sin costo pasobra e ta parti di su trabao. Tur esaki ta den ley y pesey ley ta bisa cu tur famia sin excepcion tin cu paga na Serlimar pa e servicicionan aki cu ta wordo brinda.

Serlimar tin cu piki e sushi di hende cu tabata tin un compania priva cu sea e no a paga mas e no a cumpli mas cu e servicio, segun e dignatario, pasobra e sushi aki no por keda benta ey bao pasobra e ta trece un problema di salubridad pa e bario. Esaki, segun e mandatario ta skirbi den ley tambe. Pesey tur hende cu tin entrada na Aruba, ta wordo cobra un tarifa, pa e compania brinda e servicio menciona.